

APPENDIX C. (BULL D).

Bull said to have been issued by Alexander VI. and dated September 25, 1493, as printed in the "Fonti Italiani." No trace of any original having been found, it was copied into that collection from Solorzano "De Indiarum Jure," Madrid, 1629. The Latin version is supposed to be a re-translation by Solorzano from a Spanish version made by one of the secretaries of Philip II., A.D. 1554.

ALEXANDER episcopus, servus servorum Dei, charissimo in Christo filio Ferdinando regi et charissimæ in Christo illæ Hellizabeth reginæ Castellæ, Legionis, Aragonum et Granatæ, illustribus, salutem et apostolicam benedictionem. Dudum siquidem omnes et singulas insulas et terras firmas inventas et invenendas versus occidentem et meridiem, quæ sub actuali dominio temporali aliquorum dominorum christianorum constitutæ non essent, vobis heredibusque et successoribus vestris Castellæ et Legionis regibus in perpetuum motu proprio et de certa scientia ac de apostolicæ potestatis plenitudine donavimus, concessimus et assignavimus: vosque ac heredes et successores prefatos de illis investimus; illarumque dominos cum plena, libera et omnimoda potestate, auctoritate et jurisdictione constituimus et deputavimus, prout in nostris inde confectis litteris, quarum tenorem, ac si de verbo ad verbum præsentibus insererentur, haberi volumus pro sufficienter expressis, plenius continetur. Cum autem contingere posset quod nuntii et capitanei aut vassalli vestri versus occidentem et meridiem navigantes, ad partes orientales applicarent, ac insulas et terras firmas, quæ inde fuissent vel essent, reperirent, nos volentes etiam vos favoribus prosequi gratiosis, motu et scientia ac potestatis apostolicæ plenitudine similibus, donationem, concessionem, assignationem et litteras prædictas, cum omnibus et singulis in eisdem litteris contentis clausulis ad omnes et singulas insulas et terras firmas inventas et invenendas, ac detectas et detegendas, quæ, navigando aut itinerando versus occidentem aut meridiem hujusmodi sint vel fuerint aut apparuerint, sive in partibus occidentalibus vel meridionalibus et orientalibus et Indiæ existant, auctoritate apostolica, tenore præsentium in omnibus et per omnia, perinde ac si in litteris prædictis de eis plena et expressa mentio facta fuisset, extendimus pariter et ampliamus. Vobis et hæredibus et successoribus vestris prædictis per vos, vel alium seu alios, corporalem insularum ac terrarum prædictarum possessionem propria auctoritate libere apprehendendi ac perpetuo retinendi, illasque adversus quoscumque impediētes etiam defendendi, plenam et liberam facultatem concedentes, ac quibuscumque personis etiam cujuscumque dignitatis, status, gradus, ordinis vel conditionis, sub excommunicationis lætæ sententiæ, pena, quam contrafacientes eo ipso incurrant, districtus inhibentes, ne ad partes prædictas ad navigandum, piscandum, vel inquirendum insulas vel terras firmas, aut quovis alio respectu seu colore, ire, vel mittere quoquomodo præsumant, absque expressa vel speciali vestra ac hæredum et successorum prædictorum licentia. Non obstantibus constitutionibus et ordinationibus apostolicis, ac quibusvis donationibus, concessionibus, facultatibus et assignationibus per nos vel prædecessores nostros, quibuscumque, regibus vel principibus, infantibus, aut quibusvis aliis personis, aut ordinibus et militibus de prædictis partibus, maribus, insulis atque terris, vel aliqua eorum parte, ex quibusvis causis, etiam pietatis vel fidei aut redemptionis captivorum, et aliis quantumcunque urgentissimis, et cum quibusvis clausulis etiam derogatoriis derogatoriis, fortioribus, efficacioribus et insolitis, etiam quascunque sententias, censuras et penas in se continentibus, quæ suum per actuale et reale possessionem non essent sortitæ effectum, licet forsitan aliquando illi quibus donationes et concessionis hujusmodi factæ fuissent, aut eorum nuntii, ibidem navigassent. Quos tenores illarum etiam præsentibus pro sufficienter expressis et insertis habentes, motu, scientia et potestatis plenitudine similibus omnino revocamus, ac quoad